

21.september

Uunga siunnersuut: Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat nr. xx, yy 2016-imeersoq.

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Nunatsinni nalunaarsuiffik GER atorlugu suliffiutilinnik nalunaarsuineq ingerlanneqarpoq, tassani ulluinnarni suliffeqarfiit allattorsimaffiat katersuuffeqarput taamaasilluni Akileraartarnermut tunngasut aammalu namminersorlutik suliffiuteqartut pisortallu akornanni sullissinerit teknikitigut ingerlanneqarsinnaallutik.

Siunnersuut malillugu GER atorlugu nalunaarsueriaatsip ineriartorteqqinneqarnissaanut piffissaq naleqqukkunnaarsimavoq ilaatigut nunanik allanik suleqateqarniarnermi allaffissornikkut nalunaarsueriaatsit assigiinngitsuinnaratik aamma aporfeqartartut oqariartuutigineqarmat.

Siumumiit nuannaarutigaarput inatsimmi malittarisassat misissorneqarnerat annertusisaq taamaalluni inatsisissap pineqartup akuerineqarnerani inatsisit nutartikkat pigineqalissammata.

Tamanna tunngavigalugu anguniarneqarpoq oqartussaasut akornanni assigiimmik nalunaarsuisalernissaq tassalu CVR-imik atuilernikkut tamanna anguneqarsinnaassasoq, taamaasilluni oqartussat akornanni allaffissornikkut piffissaq atorineqartartoq aningaasartuutigineqartartullu annikillisinneqassasut nalunaarsueriaatsit eqaallisarnerisigut.

Siunnersuummi oqilisaataasussat taaneqartut ilagaat Kalaallit Nunaanni Danmarkimilu pisortatut oqartussat digitaliusumik sullissinerit pitsaanerusumik periarfissaqalissasut, soorluttaaqq ullumikkut CPR inuit normuinut tunngatillugu sullissinerit taamatut ingerlanneqareersut.

Ingerlatseqatigiiffiit suliffeqarfiillu oqartussaaffigineqarnerat suli nunatsinni tiguneqanngilaq, tamanna tunngavigalugu GER atorunnaarlugu CVR-imut nuunneq nunatsinnut aningaasartuutiniq qaffaavigineqassanngilaq taamatullu aningaasaliissutaareersut iluini naammassineqarsinnaassasoq naatsorsuutigineqarluni.

Siumumiit iluarisimaarparput pissusissamisoortillugulu nalunaarsuinerit CVR-imut nuunneqassappata, taamaaliornikkut naatsorsuutigineqarmat ilassusiisoqassasoq kalaallit oqaasiinik atuisunut quppernarnik taamaasilluni oqaatsivut atorlugit periarfissat ammaaneqassammata.

Ilanngullugu Siumumiit oqaatigissavarput suliffeqarfiit NemID-mik tunineqarnissaat iluarisimaaratsigu, tamanna innuttaasunut pisortat sullissineranni oqilisaataareersoq suliffeqarfinnut

aamma oqilisaataassammat.

Siumumiit kaammattuutigissavarput isumaliutigilluaqqullugu sumiiffinni Akileraartarnermut tunngatillugu kiffartuussiveqarneq nalilersorluarneqassasoq, taakkuusussaammata ulluinnarni akileraartarneq pillugu suliffeqarfinnut qanimut attaveqarnermikkut sukkanerusumik sullissisinnaasussat.

Ukiuni aggersuni oqartussaaffiit pineqartut angerlaassorneqarnissaat Naalackersuisunit siunertaavoq, taamaattumik pingaaruteqarpoq niuernikkut nunani allani ammaassisoqariartornera ilutigalugu inussutissarsiortunik nalunaarsueriaatsip nunatsinnut tulluarsagaasumik isumaliutigineqarnissaa.

Taamatut Siumut sinnerlugu oqaaseqarlunga aalajangiiffissatut siunnersuut ilalerlugu matumuuna ataatsimiititaliamut susassaqtumut ingerlatinneqassasoq Siumumiit inassutigissavarput.

Suka K.Frederiksen

Siumut